

OFFÌCIU DE SU ROSÀRIU CUN S'ADORATZIONI E BENEDITZIONI EUCARÌSTICA

testo pubblicato a conclusione del Convegno di Senis
“Gosos, Rosàriu e Cunfrarias”

30 ottobre 2005

Il testo in sardo dei tradizionali misteri gaudiosi, dolorosi e gloriosi, è basato, con aggiornamenti di lingua e di contenuto, su due “*manoscritti del Carrus*” (Confraternita del S.Rosario di San Vero Milis), uno risalente al 1718 e che contiene i testi degli Offrecimientos, Oraciones, Litanie, e i Gòsos dei Misteri “Virgen Divino sagrario” (p. 231-248), e l'altro risalente al 1731 e contenente le considerazioni dei misteri, senza gli Offrecimientos, ma con in più le orazioni conclusive delle singole tre parti (p. 251- 267). Il testo dei manoscritti è ora disponibile nella “edizione” di S. Bullegas, *La scena persuasiva*, Ed. Dell'Orso, Torino 1996, alle pagine 231-248 (manoscritto del 1718) e 252-267 (manoscritto del 1731).

Il testo dei due manoscritti si ritrova in versione integrata e aggiornata in un “*rituale*” parrocchiale della zona di Oristano (o forse della stessa cattedrale?) risalente a prima del 1904, ma con i Gosos della Madonna del Rosario “Serenissima aurora” al posto dei Gòsos dei Misteri (cfr. pp. 156- 179). Nel presente sussidio destinato alla preghiera comunitaria si è provveduto ad alcune modifiche di aggiornamento, soprattutto nei misteri dolorosi, senza preoccuparci di indicarle con precisione filologica, come era del resto nello spirito tradizionale di questo tipo di manoscritti.

Il testo dei Gòsos dei Misteri è quello di Giovanni Delogu Ibba del 1736 (*Index Libri Vitae*, p. 410-417, come ora appare nella “edizione” di G. Marci, Cuccu, Cagliari 2003).

MODU DE ARRESAI SU ROSÀRIU CUN S'ADORATZIONI E BENEDITZIONI EUCARÌSTICA

In nómini de su Babbu, de su Fillu e de su Spìritu Santu. Amen Gésus.

Oberei, o Sennori, is lavrasostas po benedixiri su Santu Nómini bostu, e cuddu ancoras de sa Santìssima Mama bosta Maria. Illuminai sa mènti nosta, movei sa voluntadi nosta e inflammai su coru nostu de su divinu amori bostu, po chi attentamenti e divotamenti arreseus custu santu Rosàriu, e potzaus èssiri esaudius ananti de sa divina Magestadi bosta, chi cun su Babbu e su Spìritu Santu bivéis e rennaiss po totu is sèculus de is sèculus. Amen Gésus.

Primu granu. Attu de fidi: Sennori miu Gesu Cristu, dèu crèu firmamenti chi bos seis deaderu presenti in su Santìssimu Sacramentu, e segundu su chi eis nau a is iscientis bostus, chistionendiddis de su perdonu: *Innuì duus o tres funt pinnigaus torra impari, in nòmini miu, inni ddui sèu dèu, impari cun issus.*

Su de duus granus. Attu de speràntzia. Sennori, dèu spèru chi donendisì totu a mèi in custu divinu Sacramentu, mèis a usai misericórdia, segundu su chi eis nau a is iscientis bostus: *Chi duus de bosatrus in terra s'èis a pònniri de acòrdiu in cussas cosas innui iais pigau chistioni, Babbu miu in is celus dd'as at a sighiri po bosatrus.*

Su de tres granus. Attu de caridadi. Sennori, bosu seis su Salvadori miu infinitamenti amàbili; e po cussu bos amu cun totu su còru prus de totus is cosas, e po amori bostu amu ancora is pròssimus mius comenti a mei e totu, e perdónu de còru a chini m'at offèndiu, segundu su chi eis nau a is iscientis bostus de *perdonai dónnia di fintzas a setanta bortas seti.*

Su de quartu granu. Attu de contritzioni. Sennori, dèu detèstu totu is pecaus mius chi mi faint indinniu de bos arriciri in su còru miu, propongu cun sa gràtzia bosta de mai prus pecai e de ndi fuiri is occasionis, segundu su chi eis nau a su màrturu: *Càstia, ses sanau; no pechist prus.*

Su de cincù granus. Attu de umilidadi. Sennori, dèu no sèu dinniu chi bos bengeas in su coru miu, *ma narai feti una paràula, e s'ànima mia at a èssiri salvada.*

Gloria Patri et Filio et Spiritui Sancto. Sicut erat in principio et nunc et semper, et in saecula saeculorum. Amen.

[A Deus Babbu Creadori, / A su Fillu Redentori, / E a s'Amori sustanziali
Infinita gloria uguali / Immoi siat e in dónnia edadi, / E in totu s' eternidadi]

Laudadu semper siat / su nómini de Gesu, de Giusèpi e de Maria.
Laudeus prus e prus / su nómini de Maria, de Giusèpi e de Gesu.
Siat semper laudau / Su Rèi nostu Gesu Sacramentau.

Babbu nostu, chi ses in is celus, santificau siat su nòmini tuu, bengat a nòsu su rénniu tuu, siat fatta sa voluntadi tua comentì in su celu aici in sa terra.
Su pani nostu de dónnia dì donanosidd'oi, e perdonanosì is pecaus nostus, comentì nosàterus pardonaus a is depidoris nostus, e no nos lessis arrui in sa tentatzioni, ma liberanosì de totu mali. Amin Gésus.

Ave Maria, plena de gràtzia, su Sennori est cun tegus, beneditta ses tui intrè tot'is feminas, e benedittu est su frutu 'e is intrànnias tuas, Gèsus.
Santa Maria, mama de Deus, pregài po nosàterus pecadoris, imói e in s'ora de sa morti nosta. Amin Gésus.

Pustis de dónnia posta si ripitit: Glória Patri... Laudau semper siat...

*Agabau su Rosàriu, si narat o si cantat su **Salve, Regina** e, in su mesi de otobri, s'Oratzioni a Santu Giusepi.*

Oratzioni a Santu Giusèpi.

O gloriosu Santu Giusèpi, nosàterus opprimus de affannus e tribulatzionis, nos protraus a is peis tuus, e in cunfidàntzia invocaus sa protetzioni tua a pustis de nos'èssiri incumandaus a sa Santissima Sposa tua Maria.

Po cudda grandu caridadi chi t'iat uniu a sa Virgini Immaculada, Mamma de Deus, e po s'amori mannu chi coment'è Babbu iast portau a su Bambinu Gèsus, ti suplicamus de nos cuntemplai piedosu, poita siaus redimius cun su pretziosu Sànguni de Gèsus; e cun su poderi e grandesa tua cunfortanosì in is tribulatzionis nostas.

O amabili Protettori de sa Sagrada Familia, ampara sa Familia Cristiana. Atesianci de nosàterus, o Babbu amantissimu, tantis erroris chi corrupint su mundu. De su tronu de glória a su cali ses stétu sublimau, assistinosì propítziu, o fortunatissimu Protettori. E comentì in d'unu tempus iast liberau de morti su Bambinu Gèsus, libera immoi sa Crésia santa de dónnia insidia e aversidadi: siaus nosàterus costantementi rinforzaus de s'esemplu e de sa protetzioni tua, po chi potzaus virtuosamenti biviri, e a pustis de una santa morti potzaus gosai de s'eterna beatitùdini. Amen Gésus.

Pustis si cantant is Litanias, a pag. 26.

• *Candu si fait s'ADORATZIONI E SA BENEDITZIONI EUCARISTICA cun sa BENEDITZIONI, si cantat comentì a pag. 27*

• *Si non si fait s'Adoratzioni, si finit narendi:*

V. Nos cum prole pia

R. Benedicat Virgo Maria. Divinum auxilium maneat semper nobiscum. Amen.

PRIMA PARTI : MISTÉRIUS IN GÓSU

PRIMU MISTÉRIU IN GÓSU

S'Annunziatzioni de s'Angelu a Maria Santissima

In custu primu mistériu in gósu eus a considerai:

- 1) Comenti s'eterna e divina Sabiduria iat pigau unu modu tantu cumbenienti po sa saludi de su géneru umanu, chi su Fillu de Deus essit benü a si fai ómini po s'ómini.
- 2) Comenti s'Arcàngelu Gabrieli iat annunziadu po parti de Deus a sa Virgini Maria, chi issa depiat nàsciri su Salvadori de su mundu, e s'umilidadi tantu profunda cun sa cali custa Signora rispondesit: *Eccu sa serbidora de su Sennori. Deus fatzat cun mei segundu sa paràula tua.*
- 3) Comenti tantu straordinàriu fut su gósu chi iat provau sa Virgini santissima in si biri in is intrànnias suas virginalis incarnau e fatt'ómini su Fillu de Deus.

E cuntemplendi custu mistériu eus a narri... (1 Babbu nostru e 10 Ave M.)

Offresimentu. O Virgini Santissima e benaventurada, nosta Sennora de su Rosàriu: nosàterus os ofereus umilmenti custas dèxi Ave Marias e unu Babbu nostu, a su gósu chi eis tentu, candu de s'Arcàngelu Gabrieli festis stada sa laudada cun cuddas dulcis paràulas: Deus ti salvit, Maria, plena de gràtzias; e os annunziesit comenti su Fillu de Deus beniat a si fai ómini in is virginali intrannias bostas po sa saludi de su géneru umanu, e bosu cun profunda umilidadi eis rispostu: *Eccu sa Serbidora de su Sennori, si fatzat in mei segundu sa paràula tua.*

Contra sa malignidade
de su comunu adversàriu,
O Reina de su Rosàriu,
sos divotos amparade!

Pro cuddu gósu chi apegis
cun s' angelic' imbaschiada
cando in totu seberada
pro Mama de Deus istegis
cun su cunsensu chi degis
a sa eterna boluntade!

O Reina de su Rosàriu,
sos divotos amparade!

Oratzioni. Bos suplicamus, o Virgini beneditta, nos alcantzeis de su Fillu bostu tanti istimau perfetta umilidadi, cun sa cali nos dispongaus a fai totu is cosas segundu sa voluntadi sua. Amen Gésus.

SU DE DUUS MISTÉRIUS IN GÓSU
Sa visita de Maria Santíssima a Santa Elisabetta

In su de duus mistérius in gósu eus a considerai:

- 1) Comenti s'Arcàngelu Gabrieli iat nau a sa Virgini Santissima chi sa parenti sua Sant'Elisabetta iat ingendrau unu fillu in sa betzesa sua, e issa cun prestesa fiat partia a dda visitai.
- 2) Sa meraviglia cun sa cali Sant'Elisabetta dd'iat arricida e su gósu chi su pipiu Santu Giuanni, essendu ancoras in is intrànnias de sa mama, nd'iat provau.
- 3) Comenti Sant'Elisabetta, plena de su Spiritu Santu, iat pronunziadu cuddas dulzis paràulas: Beneditta ses tui intr'e totus is féminas e benedittu est su fruttu de is intrànnias tuas.

E cuntemplendi custu mistériu eus a narri... (1 Babbu nostru e 10 Ave M.)

Offresimentu. O clementissima Virgini Maria, Abogada nosta: nosàterus os offereus umilmenti custas dèxi Ave Marias e unu Babbu nostu, a su gósu chi s'ànima bosta at provau candu cun intzendida caridadi festis andada cun tanta prestesa a visitai sa parenti bosta Sant'Elisabetta e festis istada in cumpangia sua gasi tres mesis; cun sa cali visita su pipiu Santu Giuanni, ancoras in is intrànnias de sa mama sua, fiat stau santificau, e bosu, Signora, fiais stada de issa saludada e connota po Mama de Deus.

Pro s' amorosa visita
cando sant' Elisabetta
de su spìritu repleta
bos jamesit benedicta
connoschende s' infinita
Incarnada Magestade !
O Reina de su Rosàriu,
sos divotos amparade!

Oratzioni. Bos suplicamus, Mama nosta misericordiosissima, nos alcantzeis de su Fillu bostu pretziosissimu una fervorosa caridadi cun is pròssimus nostus, e chi is ànimasostas merexant reciri de Deus sa santificatzioni e noscimentu de is divinus mistérius. Amen Gésus.

SU DE TRES MISTÉRIUS IN GÓSU
Sa nàscida de Gesu Cristu in sa grutta de Betlem

In su de tres mistérius in gósu eus a considerai:

- 1) Comenti, cumplidus is nòi mèsis de s'Incarnatzioni de su Fillu de Deus, istendu sa Virgini Santissima in su portali de Betlem, nascesit de Issa su Fillu suu santissimu, e ddu fascetit in pòburus pannus e ddu pongesit aintru de s'istadda in d-una mandiadroxa de animalis, po non ténniri mellus logu de ddu collocai.
- 2) Si dèpit considerai su càntidu festosu de is Àngelus, sa devotzioni de is pastoris e s'òbbe-diéntzia de is animalis a su Creadori insoru.
- 3) Considereus, infinis, su gósu de sa Virgini Santissima e su devotu servitziu che prestaiat santu Giusèpi a su Bambinu Gesu chi fiat nàsciu.

E cuntemplendi custu mistériu eus a narri: ... (1 Babbu nostru e 10 Ave M.)

Offresimentu. O Virgini poderosissima e beneditissima Mama de nostru Sennori, gósu sempiternu: nosàterus bos offereus umilmenti custas dèxi Ave Marias e unu Babbu nostu, a su gósu chi s'ànima bosta at tentu candu de is Virginalis intrànnias bostas, po su rescatu de su géneru umanu, su Fillu de Deus nascesit, e cun gósu e riveréntzia ammiràbili in pòberus pannus fasciau e aintru de una mandiadroxa de animalis collocau suba duru fenu e pala, in mesu a duus animalis, comentis verdaderu Deus dd'adorestis, in su cali nascentu is còrus Angelicalis cantesint: "Glória a Deus in is alturas de is cèlus e paxi in sa terra a is óminis de sa bona voluntadi sua".

Pro cuddu partu diciosu
chi apegis sena dolore
parturinde su Segnore
cun inefàbile gósu
sola cun solu s' Isposu
ricos in sa pobertade!

O Reina de su Rosàriu,
sos divotos amparade!

Oratzioni. Bos suplicamus, nos alcantzeis de custu Fillu bostu pretziosu amori de sa pobe-resa vertadera: chi, apartaus de is cosas de su mundu, ddu potzaus perfettementu serbiri, e continuamenti nàsciat in nosàterus cun d-unu fervori nou de caridadi. Amen Gésus.

SU DE CUARTU MISTÉRIUS IN GÓSU
Sa presentazioni de su Babinu Gesùs a su Templu
e s'adoratzioni de is Tre Reis

In su de quartu mistérius eus a considerai:

- 1) Comenti sa Virgini Santissima, depustis di èssiri stau su Fillu suu preziosissimu de is Àngelus glorificau, de is pastoris visitau e de is tres Rèis de s'Orienti adarau, ddu portesit a su Templu de Gerusalèmi po ddu presentai a su Babbu Eternu, offerendi su pipiu Gesus cun d'una offerta de poberus, assuggetendusi issa pustis de coranta diis a sa lèi de sa Purificatzioni.
- 2) Comenti su santu bécciu Simeoni (chi tantu disigiada biri custa dii) ddu portesit in is bratzus suus, nendu cuddu dolci càntigu: *Immoi, O Sennori, manda in paxi su serbidori tuu, poita chi is ogus mius ant bistu su Salvadori de su mundu.*
- 3) Comenti fiat stau connotu de sa santa fiuda Anna, chi inni fiat presenti, e in cuss'occasione a preséntzia de totus alabesit e glorifichesit a su Sennori.

E cuntemplendi custu mistériu eus a narri... (1 Babbu nostru e 10 Ave M.)

Offresimentu. O Virgini Santissima e benaventurada, giardinu de totus is virtudis: nosàterus bos offereus umilmenti custas dèxi Ave Marias e unu Babbu nostu, po su gósu chi eis arriciu, candu depustis di èssiri stau Fillu bostu glorificau, visitau e adarau, cumplidas is coranta diis, ddu portestis a su Templu po ddu presentai a s'Eternu Babbu, aundi de su Santu bécciu Simeoni e de sa Santa fiuda Anna fiat stau connotu e de issus in preséntzia de totus cunfessau.

Pro cuddu gósu dobladu
chi tengegis in su còro
mirende cuddu tesòro
chi a Figiu 'ostru an donadu
sos rees chi lu an adorado
cun profunda umilidade!

O Reina de su Rosàriu,
sos divotos amparade!

Oratzioni. Bos suplicamus, nos presentéis comenti umilis serbidoris bostus a sa divina preséntzia, po chi divinamenti in su santu Templu suu e in dónnia lógu potzaus prenuntziai e confessai sa glòria e is laudis de su Sennori. Amen Gésus.

SU DE CINCU MISTÉRIUS IN GÓSU
S' in contru de Gesùs in mesu a is Dottoris in su Templu

In su de cincù mistérius eus a considerai:

- 1) Comenti su pipiu Gesus, essendi giai a s'edadi de dox'annus, fiat andau cun su Babbu e Mama sua a su Templu de Gerusalèmi, segundu su connotu, po sa festa, e comentì issus partisint de Gerusalèmi pentzendi chi fessit in sa cumpangia.
- 2) Comenti sùbitu chi s'accatesint chi non fiat cun issus, dd'hant circau po tres diis tra is parentis e connotus insoru, e no aendiddu agatau fiant torraus cun ànsia meda a Gerusalèmi, aundi dd'incontresint in mesu a is Dottoris, iscurtendiddus e preguntendiddus.
- 3) Comenti Gesus si ndi torresit in cumpangia bosta a sa cittadi de Nazaret, aundi istàt suggettu a bosu e a Santu Giusèpi, sposu bostu, e impari cun bosu cresciat in sciéntzia e in edadi, ananti de Deus e de is óminis.

E cuntemplendi custu mistériu eus a narri: ... (1 Babbu nostru e 10 Ave M.)

Offresimentu. Nosta Sennora de su Rosàriu, amparu e consolu de is affligius: nosàterus bos offereus umilmenti custas dèxi Ave Marias e unu Babbu Nostu, a su gósu chi eis arriciu impari cun santu Giusèpi, candu apustis de su dólu de s'ànima bosta po ai pérdiu su pipiu Gesus, luxi de is ogus bostus, dd'agatestis pustis de tres diis in su Templu in mesu de is Dottoris, iscurtendiddus e preguntendiddus, e issu si ndi torresit in cumpangia bosta a sa cittadi de Nazaret, aundi est istau suggettu a bosu e a Santu Giusèpi, sposu bostu.

Pro cuddu grande consolu
chi Gesus bos at dadu
pustis de l' aer chircadu
tres dies cun pena e dolu,
cand' inter dottores solu
disputàt sa veridade. O Reina...

Offresimentu po is cincus mistérius. O Virgini Santissima Maria, nosàterus bos offereus umilmenti custa primu parti de su preziosissimu Rosàriu bostu in riveréntzia de is cincus mistérius in gósu: bos suplicamus, Sennora nostra, siais abogada nostra in sa vida e in sa morti, e nos alcantzeis de Fillu bostu benedittu perdonu de is pecaus nostus, e gràtzia particolari chi ddu potzaus serbiri, e agabeus in su santu servìziu suu. O Virgini Maria, Mama de gràtzias e de misericórdia, succurreinosi in is necessidadis nostas spiritualis e temporalis, e bos incumandaus su stadu de sa Santa Crésia, mama nostra, et de totu is pòpulus e natzionis, comentì puru a totu is parentis nostus, amigus e benefattoris, bius e mortus, in sécula seculorum. Amen.

Oratzioni. Bos suplicamus, nos alcantzeis interu consolu in is tribulatzìonis, e conformidadi cun sa voluntadi de Deus, po chi cun perfetta umilidadi e ubbidiéntzia serbaus a sa Divina Magestadi; alcantzainosi, si calincuna borta ddu perdeus, chi nisciunu riposu si agatit in is ànimas nostas, fintzas a tantu chi ddu torreus a incontrai po essiri funtana, vida e consolu de is affligius, suavidadi de is còrus nostus e vida de is vidas nostas. Amen Gésus.

SEGUNDU PARTI : MISTÉRIUS IN DÓLU

PRIMU MISTÉRIU IN DÓLU

S'oratzioni de Gesùs in s'ortu de Getsèmani

In custu primu mistériu in dólu eus a considerai:

- 1) Comenti su benedittu Gesus, depustis de ai accabada sa cena, si partisit cun is iscientis suos a s'ortu de Getzèmani, e candu fut lómpiu ddis iat nadu: *Pregai, po arresisti a s'ora trista.*
- 2) Comenti, stesiau de issus unus cantus passus, si fut postu a pregai: *Babbu miu, si bolis, boganci a illargu de mei custu calici de dolori. Cun totu custu, no siat fatta sa voluntadi mia, ma sa tua.*
- 3) Comenti fun beníu unu àngelu de su celu po ddu cunfortai, e in cuss'ora pregàt ancora de prus, e su sudori suu lompiat a terra, e pariant stiddius de sànguni.

E cuntemplendi custu mistériu eus a narri... (1 Babbu nostru e 10 Ave M.)

Offresimentu. Nosta Sennora de su Rosàriu, Mama de misericórdia: nosàterus bos offereus umilmenti custas dèxi Ave Marias e unu Babbu nostu, in memória de cuddu mistériu in dólu, candu su gloriosu Fillu bostu iat pregau in s'ortu a su Babbu Eternu po èssiri in fortzas de fai sa voluntadi sua fintzas a s'últimu, e pustis de unu iscienti suu fiat stau traixiu e intre-gau in manus de is cruelis soldaus, e accapiau a is manus, e cun d'una funi a su zugu, cun meda cruelidadi e fiersa, fiat stau portau a dòmu de su Pontifizi Annas.

Contra sa malignidade
de su comunu adversariu,
O Reina de su Rosàriu,
sos divotos amparade!

Pro cudda grande agonia
Chi sentegis, et dolore,
Cando de samben sudore
in s' ortu Jesu ispargiat,
ca sa morte ispettaiat
cun tanta tanta impiedade .

O Reina de su Rosàriu,
sos divotos amparade!

Oratzioni. Babbu nostu soberanu, Bos suplicamus, nosi alcantzeis de sighiri s'esemplu de oratzioni de su Fillu bostu istimau, e chi in is oras tristas nostas e traballus nos uniformeus a sa voluntadi de su Sennori e suffraus totu cun passientzia. Amen Gésus.

SU DE DUUS MISTÉRIUS IN DÓLU
Sa flagellatzioni de Gesu Cristu a sa columna

In su de duus mistérius in dólu eus a considerai:

- 1) Comenti in su palàtziu de su Predi Maiori is guardias chi castiànt a Gesus ddu insultànt e dd'arropànt, e, apustis de dd'ai bendau is ogus, ddi domandànt: *Faiddu immói su profeta, e Intretza chini t'at fertu!*
- 2) Comenti, in sa corti de su palàtziu, Pedru, sétziu cun is àterus acanta de su fogu, e ar-reconnotu comentis de iscientis de Gesus, po tres bortas iat frastimau de no connòsciri a su maistu suu.
- 3) Comenti, a sa fini de su processu, apustis de àiri reconnotu po tres bortas s'innocéntzia de Gesus, Pilatu dd'iat intregau in is manus de is sordaus, chi dd'ant spollau, dd'ant acapiau a una columna e aciotau a sànguni.

E cuntemplendi custu mistériu eus a narri: ... (1 Babbu nostru e 10 Ave M.)

Offresimentu. Nosta Sennora de su Rosàriu, nosàterus bos offereus umilmenti custas dèxi Ave Marias e unu Babbu nostu, in memòria de su dolori chi Fillu bostu at provau, candu cuddu chi bestit is celus de ermosura e su chi est prus bellu de totus is fillus de is óminis, fiat stau in preséntzia de totus spollau e sbregungiu, accapiau a una columna e de is barbarus ministrus crudelissimamenti aciotau.

Pro cuddu dolu sobradu
chi apegis Virgine trista
cun sa lamentosa vista
de unu Deus flagelladu
a sa columna ligadu
sen'alguna piedade.

O Reina de su Rosàriu,
sos divotos amparade!

Oratzioni. Deus, Babbu nostu misericordiosu, bos suplicamus, nos alcantzeis chi, arregordendi s'esemplu de Santu Perdu, comentis de issu potzaus furriai de pentzamentu e apartai de nosàterus dónnia presuntziones e superbia, aici de pòdiri patiri affrontus e ingiùrias po su Sennori nostu Gesu Cristu, chi immói bivit e rénniat po totu is sèculus de is sèculus. Amen Gésus.

SU DE TRES MISTÉRIUS IN DÓLU
Gesus coronau de spinas

In su de tres mistérius in dólu eus a considerai:

- 1) Comenti is sodraus, apustis de àiri aciotau a Gesu Cristu, dd'ant postu in conca una corona de ispinas, dd'ant bestiu cun d-unu mantu arrùbiu, e ddi narànt: *Deus ti salvit, su rèi de is Giudeus!*
- 2) Comenti Gesus fut bessiu a foras, portendu sa corona de ispinas e su mantu arrubiu, e Pilatu dd'iat amostau a sa genti, nendiddis: *Castiaiddu, cust'òmini!*
- 3) Comenti bidendiddu, is predis maioris e is guàrdias si fiant postus a aboxinai: *A sa gruxi! A sa gruxi!* E comenti infinis Pilatu dd'iat intregau a manus insoru po chi fessit apicau a sa gruxi.

E cuntemplendi custu mistériu eus a narri... (1 Babbu nostru e 10 Ave M.)

Offresimentu. Nosta Sennora de su Rosàriu: nosàterus os offereus umilmenti custas dèxi Ave Marias e unu Babbu nostu, in memória de su dolori chi Fillu bostu e Sennori nostu Gesu Cristu at patiu candu de is cruelis buginus si ddi fiat stada inclavada una corona de pungentissimas spinas.

Pro sa sensible pena
chi apegis, santa matrona,
pro sa ispinosa corona,
chi oscuresit sa serena
cara de bellesa piena,
chi respiràt santidade.

O Reina de su Rosàriu,
sos divotos amparade!

Oratzioni. Deus eternu e Babbu soberanu, rèi verdaderu de su mundu, donanosì de podi cumprèndiri, arregordendi Gesus incoronau de ispinas e arrefudau, fintzas a ita puntu de violéntzia de s'unu contra s'àteru podeus lómpiri, candu si poneus a meris de sa beridadi e de sa giustitzia. Tui chi bivis e rénnias po totu is sèculus de is sèculus. Amen Gésus.

SU DE CUARTU MISTÉRIUS IN DÓLU
Su viàggiu de Gesu Cristu a su Calvàriu cun sa gruxi a pala

In su de quartu mistérius in dólu eus a considerai:

- 1) Comenti Pilatu iat liberau a Barabba e iat lassau Ghesus a sa voluntadi insoru, e dd'iant carriu de sa gruxi innui ddu depiant crucifissai.
- 2) Comenti, in su mentris chi nci ddu ingolliant a su cùccuru de su Calvàriu, iant firmau unu tali chi fiat furriendi de su sartu, Simeoni su de Cirene, e dd'iant atuai sa gruxi sua po dda portai infatu suu.
- 3) Comenti in is arrugas de Gerusalèmi ddu sighiat sa genti a trumas, e féminas medas chi tzerriant agitóriu po issu. E Ghesus si fiat girau faci a issas e ddis iat nau: *Fillas de Gerusalèmi, no prangeis po mèi, ma prangei po bosàterus e totu e po is fillus de bosàterus. Poita, si trattant aici sa linna frisca, ita at a essi de cussa siccada?*

E cuntemplendi custu mistériu eus a narri... (1 Babbu nostru e 10 Ave M.)

Offresimentu. Nosta Sennora e su Rosàriu: nosàterus bos offereus umilmenti custas dèxi Ave Marias e unu Babbu nostu in memòria de su dolori chi sa Santissima ànima bosta at provau, candu eis bistu portai a s'amau Fillu bostu peri is arrugas de Gerusalèmi, cundennau a morti comenti avolotadori de is pòpulus, portendu cudda pesanti gruxi a palas, e cun custa ndi seis aturada meda affligida e dolorosa.

Pro cuddu assustu tremendu
chi bos tochesit su còro,
cando figgiu vostru de òro
passat in tantu istruèndu
cun cuddu pesu istupèndu
de sa rughe in sa citade.

O Reina de su Rosàriu,
sos divotos amparade!

Oratzioni. Babbu nostu misericordiosu, Bos suplicamus, nosi alcantzeis interu sentimentu e compassioni de còru in cussus doloris chi Fillu bostu at patiu, e comenti de Simoni su de Cirene siaus prontus a si donai agiudu is unus cun is àterus, po lòmpiri comenti iscientis infatu tuu fintzas a s'ora de sa glòria, in sa resurretzioni de sa vida eterna, po totu is sèculus de is sèculus. Amen Gésus.

SU DE CINCU MISTÉRIUS IN DÓLU
Sa crucifixioni e morti de Gesu Cristu

In su de cincus mistérius in dólú eus a considerai:

- 1) Comenti, candu fiant lòmpius a su cùccuru de su Calvàriu, iant spillau a Gesu Cristu e iant apicau a sa gruxi a issu e a àterus duus, bandidus, unu a manu dereta e s'àteru a manu manca sua. E Gesu naràt: *Babbu miu, perdonaddus, ca no scint su chi funt fadendi.*
- 2) Comenti unu de is duus bandidus dd'iat nau: *Gesu, arregodadi de mèi candu as a torrai in su rénniu tuu.* E Gesu dd'iat arrespustu: *Deaderus ti ddu naru: oi e totu as a bénniri cun mèi in paradisu.*
- 3) Comenti, a s'ora de mesudi, Gesu a boxi manna iat nau: *Babbu miu, in is manus tuas intrègu su spìritu meu.* E apustis de custus fuèddus, fut spirau. S'ufficiali romanu, bidendi su chi suzzediat, iat nau: *Cust'òmini fut diaderu un'òmini giustu.*

E cuntemplendi custu mistériu eus a narri... (1 Babbu nostru e 10 Ave M.)

Offresimentu. Nosta Sennora du Rosàriu, nosàterus bos offereus umilmenti custas dèxi Ave Marias e unu Babbu nostu in memòria de su dólú chi eis provau a pèis de sa gruxi, ma puru de su consólú chi su matessi fillu bostu bos at donau cun is ùltimas paraulas suas acinnendi a s'iscienti suu prus istimau chi fiat a costau bostu: *Sa fémìna, eccus a fillu tuu.* E a issu iat nau: *Eccus a mama tua.*

Pro cudda crudele ispada,
chi s'alma bos traspasesit,
cando a Gesu inclavesit
sa zente depravada
colmende cun sa lantzada
sa barbara crudeltade.

O Reina...

Pro cuddu forte lamentu
chi fategis dolorosa,
cando in sos bratzos penosa
isclavadu lu agis tentu
mirende su chelu atentu
tantu rara piedade.

O Reina...

Offresimentu po is cincus mistérius. O Virgini Santìssima Maria, chi Gesu matessi s'at bòffiu donai po mama nosta, nosàterus bos offereus umilmenti custa segunda parti de su preziosissimu Rosàriu bostu in riveréntzia de is cincus mistérius in dólú: bos suplicamus, siais abogada nosta in sa vida e in sa morti e nos alcantzeis de Fillu bostu benedittu perdonu de is pecaus nostus e gràtzia particolari chi ddu potzaus serbiri e agabeus in su santu servìziu suu. O Virgini Maria, Mama de gràtzias e de misericórdia, succurreinosi in is necessidadis nostas spiritualis e temporalis, e bos incumandaus su stadu de sa Santa Crésia, mama nosta, et de totu is pòpulus e natzionis, comentu puru a totu is parentis nostus, amigus e benefattoris, bius e mortus, in sécula seculorum. Amen Gésus.

Oratzioni. Babbu nostu soberanu, chi in puntu de morti as arriciu sa vida de su fillu tuu Gesu Cristu po sa resurretzioni in sa potènzia de su Spìritu santu, donanosì sentimentu vertaderu de sa passioni de nostu Sennori Gesu Cristu, po chi morgiaus cun vertaderu dolori a is peccaus nostus e potzaus bivi una vida noa cunfromma a su batiari chi eus arriciu. Amen Gésus.

TERZA PARTI: MISTÉRIUS IN GLORIA

PRIMU MISTÉRIU IN GLORIA Sa Resurretzioni de Gesu Cristu

In custu primu mistériu in glória eus a considerai:

- 1) Comenti sa primu dì de sa cida, a mangianeddu, is féminas fiant andadas a sa tumba de Gesus, portendi is profumus chi iant aprontau, iant biu sa pedra arrumbulada, ma, intradas a sa tumba, no iant agatau su corpus de Gesus.
- 2) Comenti sa bòxi de is àngelus iat nau a is féminas: *Poita ddu seis cichendi in mesu de is mortus, issu chi est biu? No est innoi, ma est stètiu resuscitau.*
- 3) Comenti su Risortu si fiat presentau a is féminas e a is iscientis suos, e fut istètiu reconnotu de is duus iscientis de Emmaus, a su momentu de pratziri su pani.

E cuntemplendi custu mistériu eus a narri... (1 Babbu nostru e 10 Ave M.)

Offresimentu. Nosta Sennora de su Rosàriu, nosàterus bos offereus umilmenti custas dèxi Ave Marias e unu Babbu nostu a s'ineffabili gósu chi eis tentu in sa gloriosa Resurretzioni de su Fillu bostu istimau, candu de siguru a bosu si presentesit innantis de totus, gloriosu e triumfanti resuscitau, e su dólu bostu si cambiesit in summa alegria, e depustis in signali de su grand'amori suu s'appresenteit a is santas féminas e medas bortas a is apòstolos e iscientis suos.

Contra sa malignidade
de su comunu adversariu,
O Reina de su Rosàriu,
sos divotos amparade!

Pro cudda suprema glòria
chi apegis sena iguale,
resuscitende immortale
coronadu de vittoria,
Gesus, fatende notòria
sa sua divinidadade.

O Reina de su Rosàriu,
sos divotos amparade!

Oratzioni. Babbu nostu soberanu, funtana d'eterna vida, bos suplicaus de nos alcantzai ver-daderu gósu de sa bona cunsciéntzia e chi is ànimas nostas resuscìnt a vida noa e costùmi-nis nous. Amen Gésus.

SU DE DUUS MISTÉRIUS IN GLÒRIA
S'Ascensioni de Gesu Cristu a su Celu

In su de duus mistérius in glòria eus a considerai:

- 1) Comenti cumplidas is coranta diis de sa Resurretzìoni, su Sennori Gesu si fiat appresen-tau s'ultima borta a is ùndixi iscientis suos chi stiaint ritiraus.
- 2) Comenti ddus at portaus a su Monti de Is Olivàrius, de undi si dispedesit de issus e de sa Virgini Mama sua.
- 3) Comenti, pesadas is manus a celu, iat benedixiu a is iscientis suos, e mentris ddus be-nedixiat, si fut stesiau de issus e fut arziau facias a is cèlus, lassendi plenus de amori e de speràntzia totu cuddus chi in fidelidadi ddu depiant serbiri in sa terra.

E cuntemplendi custu mistériu eus a narri... (1 Babbu nostru e 10 Ave M.)

Offresimentu. Nosta Sennora de su Rosàriu, nosàterus bos offereus umilmenti custas dèxi Ave Marias e unu Babbu nostu a s'allegria e gósu chi eis tentu in sa gloriosa Ascensiòni de Fillu bostu e Sennori nostu, candu ddu eis bistu artziendi a is Celus, aundi est sètziu a sa manu deretta de Deus su Babbu, e lassendu a bosu, o Sennora nosta, maista de sa santa scola sua.

Pro cuddu grande allegrone
chi apegis, Virgine pura,
Gesu volende a sa altura
in celeste processione,
dada sa benedissione
cun meda solemnidade.

O Reina de su Rosàriu,
sos divotos amparade!

Oratzioni. Babbu de s'eterna glòria, chi in su Cristus sètziu a sa manu dereta bosta nos amostais sa matessi umanidadi nosta artziada a costau bostu, bos suplicamus, nos alcantzeis cun s'agiudu de su Spìritu Santu de bìviri comenti mèrmus dignus de su corpu suu, cun sa speràntzia de ddu podi sodigai in sa glòria. Amen Gésus.

SU DE TRES MISTÉRIUS IN GLÓRIA
Sa benida de su Spìritu Santu asuba de is Apòstulus e de Maria Santìssima

In su de tres mistérius in glória eus a considerai:

- 1) Comenti su Bonu Maistu e Pastori iat promìtiu de no lassai is iscientis suos desconsolaus, e de ddis mandai su Spìritu Consolatori.
- 2) Comenti, cumplidas is dii de Pasca 'e Froris, istendu cun is iscientis suos sa Virgini Santìssima, ddis mandat su Spìritu Santu in figura de linguas de fogu.
- 3) Comenti issus, plènus de su Spìritu Santu, cun sa fortza chi iant arriciu, fiant bessius a prenuntzai sa Bona Nova de Gesus resuscitau, e comenti totus is chi ddus ascurtanta, de dònna pòpulu e naziòni, ddus cunprendiant in sa pròpriu lingua.

E cuntemplendi custu mistériu eus a narri... (1 Babbu nostru e 10 Ave M.)

Offresimentu. O Signora Mama de Deus e Mama de is orfanus, Consoladora de is desconsolaus: nosàterus bos offereus umilmenti custas dèxi Ave Marias e unu Babbu nostu po s'allegria chi eis tentu in su sagrau mistériu de sa benida de su Spìritu Santu, candu in figura de linguas de fogu abbascesit asuba de is iscientis e inflammesit tantu is còrus insoru, chi subitu comentzesint a prenuntzai sa Bona Nova, e totus ascurtàn in sa pròpriu lingua is óperas mannas de Deus.

Pro cudd' allegria summa
chi s' alma vostra sentesit
cando bos suvrabengesit
sa ave de divina puma
chi sos coros totu allumat
in fogu de caridade.

O Reina de su Rosàriu,
sos divotos amparade!

Oratzioni. Bos suplicamus, po custu gloriosu mistériu nos alcantzeis chi nosàterus mereciaus arriciri su Spìritu Santu in is ànimas nostas e chi s'aus fortificaus cun sa gràtzia sua, po chi prus no ddu offendaus, e continuamenti ddu potzaus serbiri. Amen Gésus.

SU DE CUARTU MISTÉRIUS IN GLÓRIA
S' Assuntziòni de Maria Santissima a su Celu

In su de quartu mistérius in glória eus a considerai:

- 1) Comenti Gesu Cristu Sennori nostu at bóffi premiai is dòlus de sa Santissima Mama sua.
- 2) Comenti, lómpia s'òra de sa diciosa morti sua (comenti pìedosamente si podit crei), accumpangiada de milliaris de Angelus, Gesu dd'at arricia torra in sa glória, in corpus e in ànima.
- 3) Comenti s'est avverada primeramenti po sa Mama sua su dìciu de Gesu a is iscientis suus: *Dèu andu a s'aprontai su logu. Et de su logu aundi andu dèu, bosàterus connoseis sa bia.*

E cuntemplendi custu mistériu eus a narri... (1 Babbu nostru e 10 Ave M.)

Offresimentu. O Alta Signora, Reina de is Cèlus: nosàterus bos offereus umilmenti custas dèxi Ave Marias e unu Babbu nostu a su gloriosu mistériu de s'Assuntzioni bosta, candu su Fillu bostu bos at arriciu in sa glória eterna, Mamma amorosa de su Sennori de totus.

Pro cudd' allegra pregunta,
Qui sos Anguelos fatesin,
Quando altzare bos videsin
Subra totu issos assumpta,
Suavemente disunta
Pro viver sa eternidade.

O Reina de su Rosàriu,
sos divotos amparade!

Oratzioni. Bos suplicamus, chi siais Abogada nosta in dónnia logu e in dónnia tempus, e in s'òra de sa morti nosta nosi defendais de is trassas de su Demóniu, po chi is ànimasostas potzant andai a gosai su Deus e Sennori nostu po totu s'eternidadi. Amen Gésus.

SU DE CINCU MISTÉRIUS IN GLÓRIA
S'incoronatzioni de Maria Santissima asuba de is Angelus e de totu is Santus

In su de cincus mistérius in gloria eus a considerai:

- 1) Comenti sa Mamma de Deus fiat stada arricida cun grandissima allegria e cànticus celestialis de is còrus de is Àngelus e de totu is Santus e Santas de su Celu.
- 2) Comenti fiat stada coronada de sa Santissima Trinidadadi po Reina de su Celu e constituida po Signora de is Angelus, abogada de su géneru umanu e tesorera de is benis celestialis.
- 3) Comenti dèxit a glorificai e alabai a sa Santissima Trinidadadi po àiri tantu inaltzau a custa Sennora, issa chi in su mundu fiat istétia sa prus ùmili de totus is creaturas.

E cuntemplendi custu mistériu eus a narri... (1 Babbu nostru e 10 Ave M.)

Offresimentu. Nosta Sennora de su Rosàriu, totu speràntzia nosta pustis de Deus: nosàterus bos offereus umilmenti custas dèxi Ave Marias e unu Babbu nostu a su mistériu gloriosu de sa coronatzioni bosta, chi fiat su cumplimentu de totu is gósus e recumpensa de is grandus merescimentus bostus, candu seis istétia inalzada suba is àngelus, e de sa Santissima Trinidadadi, Babbu Fillu e Spiritu Santu, coronada e constituida po Sennora e Reina, Patrona e Abogada de totu cuddus chi de coru a bosu s'incumandant.

Pro su jubilu estremadu
chi gosades in eternu,
cun su absolutu governu
chi Deus bos at donadu,
cando bos at coronadu
subra dónia potestade. O Reina...

Offresimentu po is cincus mistérius in glória. Nosta Sennora de su Rosàriu, saludi de is chi in bosu tenint cunfianza, nosàterus bos offereus umilmenti custa tertza parti de su preziosissimu Rosàriu bostu, in riveréntzia de is cincus mistérius in glória. Bos suplicamus, siais abogada nosta in sa vida e in sa morti, e nos alcanteis de Fillu bostu benedittu perdonu de is pecaus nostus e gràtzia particolari chi ddu potzaus serbiri, e agabeus in su santu serviziu suu. O Virgini Maria, Mama de gràtzias e de misericórdia, succurreinosi in is necessidadias nostas spiritualis e temporalis e bos incumandaus su stadu de sa Santa Crésia, Mamma nosta, e de totu is natzionis, e bos incumandaus puru totus is parentis nostus, amigus e benefattoris, bius e mortus, in sécula seculorum. Amen Gésus.

Oratzioni. Bos suplicamus, Sennora nosta gloriosissima, si digneis nos alcantzai dónus e gràtzias abundantis, a custus indignus serbidoris bostus chi biveus in custa valle de lagrimas, po chi meresciaus alcantzai sa vida eterna, gosèndu de sa preséntzia bosta Santissima cun su Babbu, cun su Fillu e cun su Spiritu Santu. Amen Gésus.

QUARTA PARTI: MISTÉRIUS IN LUGORI

PRIMU MISTÉRIU IN LUGORI

Giuanni Batista bàtiat Gesus a su riu Giordanu

In su primu mistériu in lugori eus a considerai:

1. Comenti Giuanni Batista s'èst presentau in su desertu prenuntziendi a furriai de pentzamentu, ca fiat po lòmpiri infatu suu unu prus forti de issu, chi depiat batiai in Spìritu santu po su regnu de Deus.
2. Comenti Gesus benit de sa Galilea a su riu Giordanu po si fai batiai de Giuanni, in mesu de de totu is àterus, e aici s'at ammostau comentu dèxit a fai sa voluntadi de Deus totu intera.
3. Comenti, candu Gesus fut istètiu batiau, si funt abertus is celus e Gesus at biu su Spìritu abascendi che columba e benendi a pitzus suu, e sa boxi de su Babbu eternu dd'at prenuntziau Fillu suu Istimau, a su modu de Isaccu, fillu istimau de Abram, su babbu suu.

E cuntemplendi custu mistériu eus a narri... (1 Babbu nostru e 10 Ave M.)

Oporu, si podit annuntziai su mistèriu cun su cantu de is goggius, si non si cantant apustis de s'offresimentu.

As incarnadu, Maria,
Su Misteru de s'Amore :
In su Misteru nos ghia
De sa vida de su Segnore.

Primu misteru in lugore. Cuntemplamus:

Gesus cando a su Giordanu	E appenas batizadu
Andat pro si batizare,	In su chelu apertu at vidu
A su Divinu Pianu,	S'Ìspiridu 'e Deus faladu
Chi su mundu dèt sarvare,	Che de columba vestidu.
Resolutu ponet manu,	E su Babbu l'at giamadu:
Send' isse su Sarvadore.	«Fizu meu 'e tant' amore».

Offresimentu. Nosta Sennora de su Rosàriu, nosàterus bos offereus umilmenti custas dèxi Ave Marias e unu Babbu nostu cuntemplèndi su mistériu de Gesu Cristu, chi, fendisi batiai a su riu Giordanu, de innocenti chi fiat s'èst postu totu de sa parti de is pecadoris, e morendi in sa gruxi s'èst ammostau fillu amau e amanti de Deus e de is òminis.

Oratzioni. Deus soberanu e Babbu nostu amantíssimu, bos eis cunsagrau cun Spìritu Santu su Fillu bostu Istimau e ddu eis postu a luxi de su mundu e a paxi po totu is pòpulus: a nosu chi arregordaus su mistériu mannu de su bàtiu suu a su riu Giordanu, donainosì de pòdiri sèmpiri fai in totu sa voluntadi bosta, comentu de fillus bostus istimaus, prontos a torrai a bos e a is àterus s'amori chi eus arriciu. Amen Gésus.

SU DE DUUS MISTÉRIUS IN LUGORI
A sa cóia in Cana 'e Galilea Gesù incumintzat is operas suas

In su de duus mistérius in lugori eus a considerai:

1. Comenti ddu' iat istètiu una festa de cóia in Cana de Galilea e ddui fiat innìa sa mamma de Gesù, e comenti issa fiat istétia pronta a avverti su fillu suu ca fiat spaciau su binu de sa festa.
2. Comenti Gesù at fatu a cumprendi a sa mamma sua ca sa fini de su binu s'iat essi furriada no a bregùngia ma a glòria, donendi issu unu binu nou, mellus de prima, a su modu e totu de s'ora manna sua, candu issu matessi, de 'su spaciau' in sa morti est passau a essi "su primu de i biventis" in sa resurretzioni.
3. Comenti sa mamma de Gesù fiat istétia sa primu a cumprendi ca fut arribada s'ora de pònniri in menti a sa paràula de su fillu, e de andai infatu suu comenti iscientis infatu a su maistu.

E cuntemplendi custu mistériu eus a narri... (1 Babbu nostru e 10 Ave M.)

Opuru : Segundu misteru in lugore. Cuntemplamus:

Gesù cando, cumbidadu
In Cana a un'isposonzu,
S'abba in vinu at cambiadu,
Tue l'as vidu su bisonzu:
Sa festa t'as abbizadu
Chi fit perdende sapore.

L'avvertis preoccupada :
«Fizu, su vinu est finidu!»
«S'Ora non est arrivada!»,
Dur' isse t'at respondidu.
«Faghide su chi bos nada»,
Nàs a donzi servidore.

In su Misteru nos ghia
De sa vida de su Segnore.

Offresimentu. Nosta Sennora de su Rosàriu, nosàterus bos offereus umilmenti custas dèxi Ave Marias e unu Babbu nostu cuntemplendi su mistériu de su rénniu de Deus, innui, a su travessu de su mundu, e segundu is paràulas e s'esémpiu de Gesu Cristu, fillu bostu, is ùltimus funt primus e is primus ùltimus.

Oratzioni. Deus, creadori de is celus, luxi suba sa terra nosta, chi nos eis mandau su Verbu eternu po nos annunziai sa festa chi bos e totu nos eis preparau in sa eterna dòmu bosta: donainosi cun s'illuminazioni de su Spiritu santu de cumprendi sa Bona Nova de Gesù, e comenti is serbidoris a sa cóia in Cana de Galilea potzaus pònniri in menti a su fueddu de sa Mama, de fai totu segundu sa paràula de Gesù, fillu suu, issu chi immói bivìt e rénniat po totus is sèculus de is sèculus. Amen Gésus.

SU DE TRES MISTÉRIUS IN LUGORI
Gesus prenúntziat su regnu de Deus e a furriai de pentzaméntu

In su de tres mistérius in lugori eus a considerai:

1. Coménti Gesus, apustis chi Giuanni fut istétiu intregau a sa giustìtzia, fut andau a Galilea po annuntziai sa Bona Nova de Deus e naràt: *Su tempus est immói, s'arrènniu de Deus s'est acostiau; furriai de pentzamentu e creói a sa Bona Nova.*
2. Coménti Gesus donàt forza e cresa a is paràulas suas cun paràbbulas e sinnus mannus, sanéndi a is malàidus e perdonéndi a is peccadoris.
3. Coménti Gesus, a meri de sa di de sa resurretzioni, fut bénniu anca fiant is iscientis e ddis iat nau: *Paxi a bosatrus. Comenti su Babbu Mannu at mandau a mimi a su mundu, aici e totu deu mandu a bosàterus. Arriceì Spìridu Santu. A chini perdonais is pecaus, ddis funt perdonaus.*

E cuntemplendi custu mistériu eus a narri... (1 Babbu nostru e 10 Ave M.)

Opp. : Tertzu misteru in lugore. Cuntemplamus:

Cando Gesus est essidu	«Mudade mentalidade
Annuntziende a sa zente:	E credide a su Vanzelu! ».
«Como est su tempus cumpridu,	E mustrat sa veridade
Su Regnu 'e Deus cherente».	Chi est caminu a su Chelu.
E cussas terras ant vidu	Intendet s'umanidade
Lugh' in tantu iscuricore.	Sa nova bella 'e s'amore!

In su Misteru nos ghia
De sa vida de su Segnore.

Offresimentu. Nosta Sennora de su Rosàriu, nosàterus bos offereus umilmenti custas dèxi Ave Marias e unu Babbu nostu cuntemplendi su mistériu de Gesus, verbu eternu, maistu nostu misericordiosu, chi nos at annuntziau cun paràulas e cun òperas mannas sa misericòrdia de Deus, rèi nostu soberanu.

Oratzioni. O Deus, rèi nostu soberanu, chi eis impromìtiu a is pòburus e a is ùmilis sa festa manna de su rénniu bostu, donainosi de furriai de pentzaméntu e de s'ighiri sa via de su Fillu bostu, Gesu Cristu, maistu mannu de sabidoria, e aici potzaus in is tempus nostus prenuntziai nos puru sa Bona Nova, e èssiri a testimòngius de sa benditzioni e de s'ònoris chi toccant a is chi Gesus at saludau "biadus" in su rénniu bostu, bos chi biveis e renniais po totus is séculus de is séculus. Amen Gésus.

SU DE CUARTU MISTÉRIUS IN LUGORI
Gesus trasfigurau in su monti

In su de quartu mistérius in lugori eus a considerai:

1. Coménti Gesus, apustis de àiri preannuntziau s'òra de sa passioni sua, iat pigau a Perdu e a Giacu e a Giuanni e ndi ddus iat ingortus a susu, a unu monti artu, in d-unu logu a parti, feti a issus, e fut istètiu tramudau ananti insoru.
2. Coménti a is tres iscientis in su monti ddis fut aparèssiu Allias e Mosè e fiant chistionendi cun Gesùs de sa dispedida sua.
3. Coménti, tot'in d-una, una nui in su monti iat imbussau cun s'umbra is tres iscientis e iant intèndiu una boxi de sa nui narendi: *Custu est su Fillu miu istimau, ascurtaiddu!*

E cuntemplendi custu mistériu eus a narri... (1 Babbu nostru e 10 Ave M.)

Opp. Quartu misteru in lugore. Cuntemplamus:

Cand'a unu monte artzadu	In tanta felitzidade
Chin Predu, Giovanne e Giagu	Nât Predu: «Istamus inoghe!»
S'est Gesus trasfiguradu,	Finit cussa claridade,
E discurrinde unu pagu	E s'intendet una voghe:
Chin Mosè e Elia est istadu	«A Fizzu meu ascurtade,
In d'unu mare 'e lucore!	Custu Fizu 'e tant' amore!»

In su Misteru nos ghia
De sa vida de su Segnore.

Offresimentu. Nosta Sennora de su Rosàriu, nosàterus bos offereus umilmenti custas dèxi Ave Marias e unu Babbu nostu cuntemplendi sa glòria de sa divinadi chi luxiat in sa cara de Gesu Cristu, candu sa matessi bòxi de su Babbu mannu dd'at presentau a is iscientis totu spantaus ,po chi dd'essint ascurtau e sighiu fintzas a s'òra de sa passioni, po lòmpiri impari cun issu a s'òra de sa resurretzioni.

Oratzioni. Deus de bonidadi e de misericòrdia, chi in sa gloriosa Trasfiguratzioni de Gesu Cristu eis cunfirmau is mistérius de sa fidi nosta cun sa testimonia de sa Lègi antiga e de is Profetas, e nos eis nadu de ascurtai su Fillu ostu istimau: donainosì chi ddu potzaus sighiri fintzas a peis de sa gruxi, po connòsciri infinis sa resurretzioni sua e sa nosta, e èssiri eredèris impari cun issu de sa vida bosta in su celu. Amen Gésus.

SU DE CINCU MISTÉRIUS IN LUGORI

Gesus si donat e nos perdonat in su santíssimu Sacramentu de s'Eucaristia

In su de cincu mistérius in lugori eus a considerai:

1. Coménti Gesus, candu is iscientis fiant papendi s'angioni de sa festa de Pasca manna, iat pigau su pani e iat nau sa beneditzioni, dd'iat pratzìu, dd'iat donau a issus e iat nau: *Pigai: custu est su corpus miu*. E aici e totu iat fatu cun su càlix de su binu.
1. Coménti dònna orta chi papaus de su pani e binu cunsagràus in s'Eucaristia, prenuntziaus s'andada de Gesus e cunfessaus sa resurrezzioni sua, fintz'a candu issu in glòria at a torrai.
3. Coménti Gesus in s'ultima cena s'at amostau fintzas a sa fini s'amori suu po Deus e po is òminis e s'at donau s'esèmpiu de su perdonu chi ponit fini a dònna violéntzia e vinditta.

Cando in sa Pascale Chena
Chin sos suos cungregadu
Pro esser s'offerta prena
Gesù mandigu s'est dadu,
De vida bundante bena,
A s'òmine peccadore.

«Est su Corpus meu donadu
Pane vivu, mandigade,
Est su Samben derramadu
Binu 'e nova umanidade».
Vintu s'antigu peccadu,
Su tempus est de s'Amore.

In su Misteru nos ghia
De sa vida de su Segnore.

Offresimentu. Nosta Sennora de su Rosàriu, nosàterus bos offereus umilmenti custas dèxi Ave Marias e unu Babbu nostu cuntemplendi su mistèriu de s'Eucaristia, candu Gesu Cristu si fait nutrimentu nostu in su pani e binu cunsagraus, sinnus de sa umanitati sua, misericordiosa e amanti, ch'issu e totu at intregau in is manus de is òminis, po èssiri cun su donu de sa vida e su perdonu sacrificiu agradèssiu chi poni fini a totu is sacrificius e vindittas.

Offresimentu po is cincus mistérius in lugori. Nosta Sennora de su Rosàriu, nosàterus bos offereus umilmenti custa tertza parti de su preziosissimu Rosàriu bostu, in riveréntzia de is cincus mistérius de luxi. Bos suplicamus, nos alcantzeis de caminai sèmpiri a sa luxi de sa paràula de su Fillu bostu benedittu po ddu pòdiri gosai eternamenti in sa glòria. Aici siat.

Offresimentu de su Rosàriu candu si narat in totu is tres partis. Nosta Sennora, Virgini santissima e mama nosta, umilmenti bos offereus custu Rosàriu, in memòria de is mistérius de sa vida gloriosa de Gesu Cristu: e Bos suplicamus in virtudi de su preziosissimu Rosàriu bostu, e po su valori de is mistérius suos, siais abogada nosta e intercessora in sa vida e in sa morti, e nos alcantzeis de Fillu bostu benedittu perdonu de is pecaus nostus, e gràtzia po ddu pòdiri serbiri, e acabeus is diis nostas in su santu servìtziu suu. Amen Gésus.

Oratzioni. Deus, Babbu mannu misericordiosu, pastori eternu, chi in Gesu Cristu, fillu bostu, a is angionis de sa pastura bosta nudda fadeis manca: donainosì de pigai parti a sa mesa de s'Eucaristia comenti de fradis chi si perdonant s'unu cun s'ateru, e aici èssiri po su mundu esèmpiu de sa paxi e de sa cuncordia de su rénniu bostu, chi biveis e renniais in is séculus de is séculus. Amen Gésus.

LITANIAS DE SA BEATA VÌRGINI

Kyrie eleison	— Christe eleison.
Christe audi nos	— Christe exaudi nos.
Pater de Coelis Deus,	— Miserere nobis.
Fili Redemptor mundi Deus,	— Miserere nobis
Spiritus Sancte Deus,	— Miserere nobis
Sancta Trinitas unus Deus,	— Miserere nobis

Sancta Maria	Virgo praedicanda	Salus infirmorum
Sancta Dei Genitrix	Virgo potens	Refugium peccatorum
Sancta Virgo Virginum	Virgo clemens	Consolatrix afflictorum
Mater Christi	Virgo fidelis	Auxilium Christianorum
Mater Ecclesiae	Speculum iustitiae	Regina Angelorum
Mater divinae gratiae	Sedes sapientiae	Regina Patriarcharum
Mater purissima	Causa nostrae laetitiae	Regina Prophetarum
Mater castissima	Vas spirituale	Regina Apostolorum
Mater inviolata	Vas honorabile	Regina Martyrum
Mater intemerata	Vas insigne devotionis	Regina Confessorum
Mater amabilis	Rosa mystica	Regina Virginum
Mater admirabilis	Turris davidica	Regina Sanctorum omnium
Mater boni consilii	Turris eburnea	Regina sine labe originali concepta
Mater Creatoris	Domus aurea	Regina in coelum assumpta
Mater Salvatoris	Foederis arca	Regina Sacratissimi Rosarii
Virgo prudentissima	Ianua coeli	Regina pacis
Virgo veneranda	Stella matutina	

Agnus Dei qui tollis peccata mundi : Parce nobis Domine.
Agnus Dei, qui tollis peccata mundi : Exaudi nos, Domine.
Agnus Dei, qui tollis peccata mundi: Miserere nobis.

V. Ora pro nobis, sancta Dei Genitrix. R. Ut digni efficiamur promissionibus Christi.

Oremus

Deus, cuius Unigenitus per vitam, mortem et resurrectionem suam nobis salutis aeternae praemia comparavit: concede, quaesumus, ut haec mysteria sanctissimo Beatae Mariae Virginis Rosario recolentes, et imitemur quod continent, et quod promittunt assequamur.

Deus, omnium fidelium pastor et rector, famulum tuum Benedictum quem pastorem Ecclesiae tuae praeesse voluisti, propitius respice: da ei, quaesumus, verbo et exemplo, quibus praeest, proficere; ut ad vitam una cum grege sibi credito, perveniat sempiternam.

Defende, quaesumus, Domine, Beata Maria semper Virgine intercedente, istum ab omni adversitate populum, et toto corde tibi prostratum, ab hostium propitius tuere clementer insidiis. Per Christum Dominum nostrum. — Amen.

CANTUS DE ADORATZIONI

O salutaris Hostia,

Quae Coeli pandis ostium :
Bella premunt hostilia,
Da robur, fer auxilium.

Uni trinoque Domino
Sit sempiterna gloria :
Qui vitam sine termino
Nobis donet in Patria. Amen.

Tantum ergo Sacramentum

Veneremur cernui :
Et antiquum documentum
Novo cedat ritui :
Praestet fides supplementum
Sensuum defectui.

Genitori, Genitoque
Laus et iubilatio,
Salus, honor, virtus quoque
Sit et benedictio :
Procedenti ab utroque
Compar sit laudatio. Amen.

V. Panem de coelo praestitisti eis.
R. Omne delectamentum in se habentem.

Oremus. Deus, qui nobis sub Sacramento mirabili, Passionis tuae memoriam reliquisti: tribue, quaesumus, ita nos Corporis et Sanguinis tui sacra mysteria venerari, ut redemptionis tuae fructum in nobis iugiter sentiamus. Qui vivis et regnas in saecula saeculorum. Amen.

- *Custus cantus de adoratzioni si podint cantai cun totu is tonus connotus de su Tantum Ergo.*

Divin' Ostia de Saludi

Chi de sa celesti Corti
A nosu is portas aperis,
Tui po aggiudu nostu accudi
Fendisi fortis gherreris
Immói e in s'ora de sa morti.

Gloria a Deus chi est unu in sèi,
E a donniuna de is Personas
Siat po sempri onori e glória:
Glória a s'altu eternu Rèi,
E a nosàterus vittoria
E celestialis coronas.

Custu grandu Sacramentu

venereus umiliaus,
e coment'e nui a su bentu
cedant is ritus passaus :
e su chi s'ogu non bidi
accetteus cum firma fidi.

A Deus Babbu onnipotenti
e a su Fillu Redentori,
cun su coru e cun sa menti
alabeus cun grandu onori;
e siat puru onori uguali
a s'Amori sustanziali.

Deus siat benedittu
 Benedittu su santu Nòmini suu
 Benedittu Gesu Cristu veru Deus e veru Ómini
 Benedittu su Nòmini de Gesùs
 Benedittu su Sacratissimu Còru suu
 Benedittu su Sanguni suu Pretziosu
 Benedittu Gesùs in su Santissimu Sacramentu de s'Altari
 Benedittu su Spìritu Santu Amparadori
 Benedittu sa grandu Mamma de Deus Maria Santissima
 Beneditta sa santa e Immaculada Cuncetzioni sua
 Beneditta sa gloriosa Assuntzioni sua
 Benedittu su Nòmini de Maria Virgini e Mama
 Benedittu su fidelissimu cunsorti suu, Santu Giuseppi
 Benedittu Deus in is Angelus e in is Santus suos

Laudate Dominum omnes Gentes, laudate eum omnes populi
 Quoniam confirmata est super nos misericórdia eius,
 et veritas Dómini manet in aeternum.

Gloria Patri et Filio et Spiritui Sancto;
 Sicut erat in principio et nunc et semper,
 et in saecula saeculorum. Amen.

Gòsos de Nostra Sennora de su Rosàriu

su trascriz. di Carlo Pisu

tradiz. di Zeddiani

Se - re - nis - si - ma a - u - ro - ra, de sos sant - tos me - lo - di - a___

8
 Pro - no - is pre - ga, Ma - ri - a, de su Ro - sa - riu Sen - no - ra.

15 (Solo) (Tutti)
 A - u - ro ra ru - ti - lan - te gem - ma fi - ne o - ri - en - ta - le___ cri - sta
 Ma - ri - a, ma - re a - bun - dan - te de gra - zias in do - gni co - sa___ Ma -

23
 li___ nu di - a - man - te, car - bun - cu ce - le___ sti - a - le___ Ro - sa in
 ri - a, so - le il - lu - stran - te, pul - chra lu - na lu___ mi - no - sa___ Ma -

30
 tat - ta vir - gi - na - le de a - flit - tos con - so - la - do - ra___ Pro -
 ri - a, cand - di - da ro - sa, to - ta ce - le - ste e de - co - ra___ Pro -

Torrada

Gòsos de Nosta Sennora de su Rosàriu

Sereníssima aurora
de sos Santos melodia,
pro nois prega Maria
de su Rosàriu Sennora.

1. Aurora rutilante
Gemma fine Orientale
Cristalinu Diamante
Carbuncu celestiale
Rosa intatta Virginale
De aflittos consoladora

4. In te fonte cristalinu
Pienu de Virginidade
Su Eternu Verbu Divinu
Segundu in sa Trinidade
Assumpsit sa umanidade
Fatendeti Genitora

7. Maria templu sagradu
Pienu de perfetzione
Maria Tronu doradu
De su sàbiu Salomone
Maria chi cun resone
Ses de gràtzias causadora

2. Aurora gloriosa
De sos chelos ornamentu
In totu misteriosa
Maria vasu de arguentu
De tesoros fundamentu
De gràtzias causadora

5. In te arcu triunfale
Circundadu de cleméntzia
Su Padre celestiale
ti pongisit sa poténtzia
Su fizu sa sapiéntzia
Su Spìritu sa gràtzia ancora

8. Maria palma de gloria
Rodeada de bellesas
Maria ricca vittoria
In donni fidele impresa
Maria ricca princesa
De dannos reparadora

3. Aurora produttiva
Perla de grande valore
Aurora diffusiva
De ogni bene e licore
Aurora chi in rigore
Ses de Deus imbasciadora

6. Sa Celeste Gerarchia
Grandes laudes intonesit
Cando Gabriele intresit
Repitinde Ave Maria
O lughe, consolu, e ghia
De s'anima peccadora

9. Maria mare abundante
De gràtzias in dogni cosa
Maria sole illustrante
pulchra luna luminosa
Maria candida rosa
Tota celeste e decora

10. Maria, sole divinu,
Maria, ligiu doradu,
Maria, virde giardinu,
Maria, ortu serradu,
Maria, vasu sagradu,
de ogni bene possessora

11. Ave Maria, saludada,
Ave, Maria, preziosa,
Ave, Maria, gloriosa,
Ave, Maria, esaltada,
Ave, Maria, abogada,
Ave, Maria decora.

I Gòsos *Sereníssima Aurora* si trovano attestati fin dal 1726 e 1731 nei “manoscritti del Carrus” (San Vero Milis), ora editi in S. Bullegas, *La scena persuasiva*, pp. 360-362 (1726-1727) e pp. 267-270 (1731). Si trovano poi identici in un manoscritto inedito della zona di Oristano del 1904 e con alcune varianti secondarie in un manoscritto del Licheri del 1900 (Ghilarza). Le medesime varianti sono attestate in Santulussurgiu (1924), e nelle antologie “conflate” del Sechi (1934) del Murgia (1979, 1980) e del Dore (1983). Le versioni di queste antologie purtroppo hanno peggiorato e diffuso versioni testualmente “corrotte”.

Si noti la costruzione accurata in crescendo, con lo sviluppo de *s'istèrrida* nelle prime tre strofe (ripetizioni in crescendo di “*aurora*”); le motivazioni teologiche nelle strofe centrali “*In te*” e l'introduzione del nome “*Maria*” nel saluto dell'angelo; la ripresa e la ripetizione litanica del nome “*Maria*” nelle tre strofe 7-8-9 (ultime nel manoscritto del Carrus), con il *climax* della sua ripetizione, sempre litanica, nelle strofe 9-10 (ultime in Licheri 1900).

La trascrizione musicale, su melodia in uso a Tramatzza, è di C. Pisu, con qualche adattamento di G. Orro.

GÒSOS PRO SOS MISTERIOS IN LUGORE

(Zuanni Antiogu Mura, Ilartzi, 2005)

Sos omnes isbaidos
ch' ant perdidu aerzu umanu,
s'agatent illichididos
arrasande fitianu.

<i>Strofa introduttiva:</i> 1. Pedimos chi etema rughe in sas oras de bisonzu, siat che sole in atonzu, ue est buju fatzat lughe, sos attrividos indrughe a su bene soberanu.	<i>Strofa conclusiva:</i> 17. o Paba, pedra segura, cun misteru lugheschidu sullea donzi afrizidu, imbolopadu in tristura, males e benes mesura, franghindenos s'ampramanu.	
2. Dae su paisu ighinu, cherinde s'anima nida, pro chi sa terrena vida esseret abba 'e trainu, at sighidu su caminu assortinde a su Giordanu.	3. In abba frisca e currente, su Battista at samunadu mantzas betzas de peccadu, da sos sinos de sa zente e Cristos Onnipotente battizat cun penzu arcanu.	4. Bessinde candidu lizu su chelu at tentu iscrariu, battizu netzessariu fit a s'innotzente fizu, chi esseret dadu assimbizu in su peleare umanu.
5. Maria mama donosa regollet netzessidade, a S'eterna Podestade dimandadu at lastimosa chi s'isposu cun s'isposa de s'istima fessint ranu.	6. Innanti de sa cumprida in sa terrena dimora, mancari fessit disora, ant pedidu azudu 'e vida cun grazzia meressida ant prenu brocca e tianu.	7. In sa festa 'e s'isposonzu prodizos at comintzadu, s'abba pro binu at mudadu, prapande raru bisonzu, umile, ancora meronzu, lughente che s'oghianu.
8. Cando onestu precursore ant potentes castigadu, su chelu si est ispricadu a mischinu e peccadore abacande su dolore, cun su reposu galanu.	9. Su marture disizosu, ant caladu in crabetura, pro chi manna disaura esseret tranzidu in gosu, e mancari memulosu movet andande lontanu.	10. Cun boghe pasida e crara, preigande in donzi logu, aperint origa e ogu, a cussa mutida rara, pintande chizos e cara fintzas omine metzanu.
11. Apartados in su monte pregant cun devotzione, bisande chi onzi pessone aperzat anima e fronte e su terrenu orizonte bestat chintas de manzanu.	12. Pedru, «Faghimos sa tenda» nat a Cristos gloriosu, isettande veru gosu, menzus tzeleste sienda, proite onzatera arrenda est nicada che cabanu.	13. Da sa nue passizera paraula armoniosa, che pregadoria ermosa, narat cun bella manera: “custu est fizu de s'ispera, fertu mundu torret sanu”.
14. Pro fagher sa pasca impare sos dissipulos preguntant, cando sunt tzertos s'appuntant detzidint ue chenare, poder menzus iscurtare su chistionu 'e fulanu.	15. Faeddande cun assentu, boghe crara che tenore, narat chi su traitore istat intro s'aposentu, chena perunu lamentu l'asant comente ghermanu.	16. Leados panes e binu, beneighet e los segat a nemos sa chena negat, pro no ponner isfainu in su disizu divinu, chi l'incravat pes e manu.

MISTERIOS LUMINOSOS
(Giovanni Andrea Migheli, Santulussurgiu 2005)

Tue ch'in s'eternu gosu
Che ses, o Maria Santa,
faghe c'apat lughe tanta
su "Misteriu Luminosu"

- | | |
|---|--|
| 1. Dae Zuanne po manu
retzit su santu batizu
Cristos de Deus Fizu
Nat Matteu, in su Giordanu,
ca si fuit fatt'umanu
li pariat doverosu | 6. Cando in d'una portantina
un'infirmu l'an portadu,
"Ti perdono ogni peccadu –
l'at nadu – e como camina!".
Sanat sa manu divina
cust'infirmu bisonzosu |
| 2. E apenas batizadu
nd'essit de s'abba Gesusu
in formè columba susu
Deus l'enit e l'at nadu:
fizu ti apo mandadu
po dare lughe riposu | 7. Cristos in pregadoria
cun Pedru, Zuannè Zagu;
arresonan de s'istragu
cun Mosè e cun Elia:
est prestu sa morte mia!
neidi sententziosu. |
| 3. E de Cana in s'isposonzu
cando su inu est mancadu
Maria a Cristos l'at nadu:
"che at de inu bisonzu"
Issu de abba ogni conzu
Faghet prenare piedosu | 8. Ma cun custos de repente
S'est Cristos trasfiguradu
a cantu Luca at contadu
Sa este l'enit lughente
e nat Deus a sa zente :
mèst fizu e virtuosu ! |
| 4. Tando leat determinu
Ch'at dare lugh'est amante,
su miraculu in s'istante
faghet,e s'abba in binu
mudat su fizu divinu
ca est bonu e portentosu! | 9. E chenande in d'un'abitu
narat s'eucaristia:
"Su pan'est sa carre mia
e custu inu lichidu
samben meu est beneittu,
cibu de s'eternu gosu ! ». |
| 5. In d'una presone fea
cand'a Zuanne ch'an postu
Cristos tando a dogni costu
Ch'est andadu a Galilea
E cun dolu e cun pelea
preigat cussentziosu | 10. « De torrare a Babbu meu
Su tempus nd'est arrivadu »,
nat Cristos, e samunadu
at sos pees, e sentz'anneu
a totu su grup'intreu
umil'e passentziosu. |

Maria ca ses sa mama
de su chi est mortu in rughe
po nois: da nos sa lughe
cand'amus bisonzu e brama,
tene attesa sa fiamma
in custu mundu orrerosu.

SOS MISTEROS IN LUGORE DE SU ROSÀRIU
(Salvator Angelo Chessa, Nuoro, Settembre 2005)

As incarnadu, Maria,
Su Misteru de s'Amore :
In su Misteru nos ghia
De sa vida de su Segnore.

<i>Primu Misteru in lugore. Cuntemplamus:</i>	Gesus cando a su Giordanu Andat pro si batizare, A su Divinu Pianu, Chi su mundu dêt sarvare, Resolutu ponet manu, Send' isse su Sarvadore.	E appenas batizadu In su chelu apertu at vidu S'Ispiridu 'e Deus faladu Che de columba vestidu. E su Babbu l'at giamadu: «Fizu meu 'e tant' amore».
<i>Secundu misteru in lugore. Cuntemplamus:</i>	Gesus cando, cumbidadu In Cana a un'isposonzu, S'abba in vinu at cambiadu, Tue l'as vidu su bisonzu: Sa festa t'as abbizadu Chi fit perdende sapore.	L'avvertis preoccupada : «Fizu, su vinu est finidu!» «S'Ora non est arrivada!», Dur' isse t'at respondidu. «Faghide su chi bos nada», Nàs a donzi servidore.
<i>Tertzu misteru in lugore. Cuntemplamus:</i>	Cando Gesus est essidu Annunziende a sa zente: «Como est su tempus cumpridu, Su Regnu 'e Deus cherente». E cussas terras ant vidu Lugh' in tantu iscuricore.	«Mudade mentalidade E credide a su Vanzelu! ». E mustrat sa veridade Chi est caminu a su Chelu. Intendet s'umanidade Sa nova bella 'e s'amore!
<i>Quartu misteru in lugore. Cuntemplamus:</i>	Cand'a unu monte artzadu Chin Predu, Giovanne e Giagu S'est Gesus trasfiguradu, E discurrinde unu pagu Chin Mosè e Elia est istadu In d'unu mare 'e lucore!	In tanta felitzidade Nât Predu: «Istamus inoghe!» Finit cussa claridade, E s'intendet una voghe: «A Fizzu meu ascurtade, Custu Fizu 'e tant' amore!»
<i>Quintu misteru in lugore. Cuntemplamus:</i>	Cando in sa Pascale Chena Chin sos suos cungregadu Pro esser s'offerta prena Gesus mandigu s'est dadu, De vida bundante bena, A s'omine peccadore.	«Est su Corpus meu donadu Pane vivu, mandigade, Est su Samben derramadu Binu 'e nova umanidade». Vintu s'antigu peccadu, Su tempus est de s'Amore.

SOS BINDIGHI MYSTERIOS DE SU SANTCTISSIMU ROSARIU
ISPOSTOS IN OTTAVA

DAE SU SAC. IOANNE BAPTISTA MADEDU

Devotu 'e su Rosariu, isculata atentu,
Si menzus fructu nde queres bogare:
Prite qui mi hapo postu in ponzamentu
Sa origine et Mysterios declamare
De custa devozione, qui strumentu
Pro medas est istadu ad si salvare;
De gloria ad sa Reina Soberana
Et de adjudu ad sa flachesa humana.

Cumpatinde sa Virgine Sagrada
De sos christianos sa desolazione,
Adposta dae su Quelu fit falada
De su Grande Gusman pro s'orazione:
De su Rosariu ad ipse presentada
L'imparesit sa grande devozione:
Cun cale, dissipada sa heregia
Ad sa Ecclesia torresit s'allegria.

In su milli et dughentos jà passados
In partes de sa Franza dominesit
S'Albigeuse heregia, qui assolados
Sos templos et altares lis lassesit:
Sos dogmas de sa Fide abbandonados;
Sacramentos et Sanctos. profanesit;
Fin sos sacros Ministros persighidos;
Sos vizios pius infames adplaudidos.

Non debes su Rosariu recitare
Cun sa mente et sentidos oziosos:
In primu logu si deen contemplare
De sa Mama Divina quimbe Gosos:
In su segundu si deen regordare
De sa Passione sos passos penosos:
In su terzu dees tenner in memoria
De Ipsa su consolu e sa gloria.

MYSTERIOS GOSOSOS

Primu Misteriu

Principiande dae su primu gosu
Dees meditare, cun ammirazione,
Su Verbu Eternu in Quelu gloriosu
Faladu pro sa humana Redempzione
Qui in su sinu s'inserrat amorosu
De pura Virgine in s' Incarnazione:
Cale su summu gosu et allegria
Deet esser tando istadu de Maria?

Segundu Misteriu

Dae s' Angelu Maria assegurada
Esser completu jà su Precursore,
Pensa, qui adpresse ad bider sa Connada
S'incaminat jucunda et cun fervore;
Et grata Elisabèht, l' hat abbrazzada
Comente Mama de su Redentore.
Et su Baptista fit santificadu,
Innantis de esser ad su mundu nadu.

Terzu Misteriu

Contempla in una istadda de animales
Cuddu Verbu Divinu appena nadu,
Cun Canticos laudadu angelicales,
Et de Rès et pastores adoradu.
Cuddos brazzos admira virginales,
Qui l'istringhen in sinu et l'han fascadu,
Et de sa Mama su grande cuntentu
Cando li dàt su lacte pro alimentu.

Quartu Misteriu

Contempla sa humilidade et devozione
Cun sa quale Maria presentesit
In su sagradu Templu cudd' Anzone,
Qui pustis in sa Rughe s' immolesit,
E in brazzos de su bezzu Simeone
Ipsa ad su Padre Eternu lu oferzesit:
Simeone ed Anna, cun summ' allegria,
Lu reconnoschen pro veru Messia.

Quintu Misteriu

Depustis qui tres dies fit quirchende
Maria cussu Fizu malogradu,
Ad su fine l' agatat disputende
Cun sos Doctores (ognunu admiradu):
Unu ratu ti resta contemplende
Su gosu qui in sa Mama hat causadu
Cando lu videt in su sacru Templi
De doctrina donende raru esemplo.

MYSTERIOS DOLOROSOS

Primu Misteriu

Finz'ad innoghe has sighidu ad Maria,
Caru devotu, in gosos et ternura:
Como li debes fagher compagna
In sas afflictiones e amargura:
Mira ad Iesus in s' Hortu in agonia,
Cun thedios, cun tristesa et cun paura,
Bagnadu de sanguine e sudore,
Cun mortales affannos et dolore.

Terzu Misteriu

Su Creadore de totus sas cosas
Comente Rè de burlas insultesin,
Cun sas maneras pius ignominiosas;
Cun istrazzos de grana lu faschesin,
Cun corona de ispinas dolorosas
Cudda sagrada testa li clavesin,
Et una canna pro scetru in sa manu
Li dan pro beffe ad su Rè soberanu.

Quintu Misteriu - 1

Anima devota, su Paziente
Contempla ad su Calvariù jà arribadu,
Sighinde avatu sa Mama dolente,
Cun coro troppu afflictu o angustiadu:
Que canes lu afferresin cudda gente
Nudu in carres haendelu ispozadu:
Subra sa Rughe a ispintas lu bettesin,
Et in ipsa pes et manos li elevísín.

Segundu Misteriu

Mira su Redentore de su mundu
Comente ladru cun funes ligadu
Dae su Iudaismu, qui ad su profundu
Fit de sos males, miseru! arribadu:
Depustis, cun blasphemias, furibundu
In sa columna l'haiat azzotadu:
Et tanti fieros colpos
Qui petza et samben in s'aera bolesin.

Quartu Misteriu

Depustis qui Pilatu confessesit
De s'amante Signore sa innocenzia,
Ad morrer in sa Rughe lu damnesit,
Barbaru! senza lege, ne coscienza:
Cussu pesante truncu s'abbrazzesit
Custu novellu Isaàc cun passienzia:
Comente fit de forzas accabadu
Medas hortas ruisit. affannadu.

Quintu Misteriu - 2

Innantis de accabare su Misteriu
Mira ad Iesus in sa Rughe pendente
In unu mare 'e pena et vituperiu
Su Eternu Fizu de su Onnipotente:
Su insultu considèra et impropriu,
Qui subfrit Maria dae cussa gente,
Et su dolore accerbu et penetrante
Ad lu vider in Rughe ispasimante.

Quintu Misteriu - 3

O caminante, qui passas per via
Mira ad Iesus in sa Rughe inclavadu:
Ad Mama et Fizu in pena et agonia
De dolore su coro traspasadu;
Et cumpati sa povera Maria
Quando in brazzos l'istringhet ispiradu
Fagheli compagna in s' amargura
Quando lu lassat in sa sepultura.

MYSTERIOS GLORIOSOS

Primu Misteriu

Bastan, caru devotu de Maria,
Tantos sospiros, qui ti han contristadu,
Rasone est qui fetas compagna
Cun custu Fizu jà resussitadu,
Dali s'inhorobona et s' allegria
In sos abbrazzos, qui l'hajat dadu:
Quando pius de su sole luminosu
Lu videt triumphante et gloriosu.

Segundu Misteriu - 2

A' custa processione pius splendore
Dae sas animas sanctas s' augmentesit,
Sas quales in triumphu su Segnore
Cun Ipse dae su Limbu nde boghesit,
Quando Primu su offiziu 'e Redemptore
Sende in sa sepoltura exercitesit:
Gasi intresit in Quelu su Rè eternu
Cun custu ispoliu pigadu ad s' infernu.

Quartu Misteriu

Devotu de sa Virgine Sagrada,
Prestu ti faltat in terra sa ghia:
Pustis qui medas annos fit istada
De su castu Ioanne in compagna
Eccòla como ad su Quelu elevada
De Angelos cun celeste melodia;
Sighila cun s'affettu ancora;
Non si olvidat de te custa Segnora.

Segundu Misteriu -1

Baranta dies pustis sun passados,
Accabbada sa humana Redemzione.
Ad su Oliveto si fin incamminados,
Formende una solomne processione,
Iesus, Maria et Apostolos sagrados,
Et discipulus puru in unione:
Inhie los beneighet jubilante
Et partit ad su Quelu triumphante.

Terzu Misteriu

Essende ad su Cenaculu torrados
Paurosos restan in orazione:
Sos deghe dies pustis terminados,
Lis falat su Paraclitu in persone:
De s'amore assora infiammados
Saltesin foras cun ammirazione:
In forma adparet de limbas ardentes,
Que figuran sas limbas diferentes.

Quintu Misteriu

Quando arribat sa Mama Virginale
Ad Quelu cun un' aera Divina,
Bessit totu sa Corte celestiale,
Et la venèran comentu Reina:
Su Fizu, cun corona imperiale
La coronat, preziosa et peregrina.
La constituit cun grandes honores
Advocada de afflictos peccadores

cantu de su rosàriu

tradiz. Villanovafranca (trascr. Carlo Pisu)

Gloria Patri (Coro Donne)



Sicut erat (Coro uomini)



Giaculatoria (Coro donne)



Giaculatoria (Coro uomini)



Babbu nostu (Coro uomini)





cantu de su rosàriu

tradiz. Villanovafranca (trascr. Carlo Pisu)

Su pani nostu (Coro donne)



Ave Maria (Coro donne)



Santa Maria (Coro uomini)

